


# TARBH SA PHÁIRC



### Pictiúr: Radharc:

Micheál agus Seán ag fiach coiníní sa pháirc, an madra, ba ar féarach; tarbh, adharca le feiceáil air, an tarbh ag déanamh ar na buachaillí agus a eireaball in airde san aer aige, na buachaillí a thaispeáint in airde ar an gcrann. Reics agus é ag cur an ruaig ar an tarbh.

### Céim 4: Coileach, muc, cat.

Gníomhartha agus geáitsiocht a dhéanamh de réir mar a bhíonn gá leo.

## CÉIM 1. CLOISTEÁIL AGUS AITHINT

### Cuntas Reatha

Bhí na buachaillí ag fiach coiníní lá. Bhí Reics in éineacht leo. Isteach leo i bpáirc. Chonaic siad ba ar féarach (ag ithe féir).

### Agallamh

**MICHEÁL:** Tá súil agam nach bhfuil tarbh anseo.

**SEÁN:** Tá adharca fada ar an gceann sin i lár na páirce.

### Cuntas Reatha

Leis sin chuala siad an tarbh ag búireach. Thosaigh an bheirt ag crith le heagla.

### Agallamh

**SEÁN:** Go bhfoire Dia orainn. Seo chugainn an tarbh!

**MICHEÁL:** Maróidh sé sinn. Rith leat!

### Cuntas Reatha

In airde leo ar chrann. Ghlaogh siad ar Reics. Chuir seisean an ruaig ar an tarbh.

## CÉIM 2. AITHRIS

## CÉIM 3. ATHRÁ Ó SPREAGTHAIGH

- (a) Spreagthaigh shúl (mar atá i gCéim 1);
- (b) Spreagthaigh chluas:

Bhí na buachaillí ag imirt peile?

Agus céard faoi Reics?

Cad a tharla ansin?

Agus cad a chonaic siad?

Tá rud éigin le rá agatsa faoin tarbh, a "Mhichíl"?

Céard faoi na hadharca sin, a "Sheáin"?

Chuala siad rud éigin?

Bhí eagla ar na buachaillí?

Abair paidir, a "Sheáin". Céard atá ag teacht?

Cad a dhéanfaidh sé, a "Mhichíl"? Abair leis rith.

Cá ndeachaigh siad?

Agus ansin?

Cad a rinne Reics?

#### CÉIM 4. CLEACHTADH MÚNLAÍ AGUS FOCLÓRA

1. Páistí ag cumadh abairtí nó sraith abairtí ag críochnú leis an múnla ..... in éineacht leo (liom, leis, etc.).
2. Le cabhair míme agus geáitsiochta páistí a mhealladh chun na comhráití seo a chríochnú ar bhealaí eagsúla:
  - (a) Tá súil agam nach .....
  - (b) Isteach leo (leis, léi, etc.) .....
3. Chuala siad an tarbh ag búireach.  
 (gach lá; amárach; níor, ar? inné; ní, an? amárach; ní, an? gach lá).  
 Feidhm a bhaint as pearsain eile seachas an tríú pearsa sna cleachtaí seo.  
 Tugtar isteach fuaiméanna roinnt de na hainmhithe eile, e.g.  
 ag tafann; ag crónán; ag feedaíl; ag géimneach, etc.
4. Thosaigh an bheirt acu ag crith le heagla.  
 (triúr/can; ceathrar; imir peile; cúigear/sleamhnaigh, etc.).

#### CÉIM 5. SAORCHOMHRÁ CRUTHAITHEACH

1. Comhrá agus ceisteanna ar na pictiúir agus ar an scéal féin.
2. Páistí ag cur síos ar gheit a baineadh astu féin.
3. Dráma: Na buachaillí in airde ar an gcrann—tháinig an feirmeoir.
4. Na buachaillí ag cruinniú sméara dubha—rith tarbh ina ndiaidh. Inis an scéal.
5. Scéalta a chumadh a mbeidh críoch mar seo leo “..... Chuir sé/sí ruaig air/orthu”.

Rann Ceoil (An ceol ar théip)

I

Lá dá raibh na buachaillí  
 Ag fiach coiníní óga  
 Bhí Reics in éineacht freisin leo  
 Ag fiach amuigh sa pháirc;  
 Chuala siad an-tarbh móir  
 Ag teacht 'na dtreo go fiochmhar,  
 "Ó! ó! deir Seán, "ó, ó", deir sé,  
 Is iad ag crith le heagla.

II

"Go bhfóire Dia orainn beirt,  
 Seo chugainn an tarbh fiochmhar,  
 Rith leat, a Reics, rith leat, a Reics,  
 Cuir ruaig ar an tarbh gránna".  
 In airde leo ar chrann fuinnseoig,  
 Ag éalú leo faoi scanradh,  
 "Bow wow", deir Reics, go glórach ard,  
 As go brách leis an tarbh láithreach.

#### COMHRÁ MÍFHÓIRMIÚIL

A

An raibh tú ar fheirm riamh?  
 Céard iad na hainmhithe (beithigh) a chonaic tú ar an fheirm?  
 Inis dom faoin tarbh.  
 An raibh adharca fada air?  
 Ar rith sé i do dhiaidh?  
 Céard a thugann an bhó dúinn?  
 Cé a chrúnn/a bhlíonn í?  
 Céard a thugann tú ar bhó óg?  
 Céard a itheann na hainmhithe sa samhradh? Sa gheimhreadh?  
 Ar mhaith leat a bheith i d'fheirmeoir?  
 Cén fáth a ndeir tú sin?  
 Inis dom faoin obair go léir a dhéanann an feirmeoir i rith na bliana.

B

Druileanna a dhéanamh ar chuid de na briathra seo a leanas  
 san Aimsir Ghnáthláithreach:  
 Tabhair, Feic, Faigh, Tosaigh.

An dtugann Mamaí lón duit gach lá?

Céard a thugann sí duit (fhaigheann tú) do do lón?

Cén chaoi a dtagann tú ar scoil?

Céard a fheiceann tú ar an mbealach?

An bhfeiceann tú a lán buachaillí agus cailíní?

An bhfeiceann tú fear an phoist .... etc.?

An dtosaíonn tú ag caint leis na buachaillí agus na cailíní eile?

An dtosaíonn tú ag súgradh leo?

Cén fáth nach dtosaíonn, etc.?